

Nunat Avannarliit Killiit Siunnersuisoqatigiiffiannut aallartitat siulittaasuata Inatsisartut Suleriaasianni § 33, imm. 3, nr. 1 malillugu aalajangiiffigisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 2/2022-imi Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni killerni naalakkersuisut inuusuttunut tunngasunik suliassaqartinneqartut 2023-mi naapisinneqassasut ulluinnarni atukkat, peqqissuseq, sunngiffimmi soqutigisat, inuit akornanni qarasiaatigut attaveqaqatigiittarfiit qulequttallu allat attuumassutillit eqqarsaatigalugit nunani pineqartuni pingasuni inuttut qanoq inissisimanerat pillugit misilittakkanik paarlaasseqatigiinnissaq aamma misissuineramik kisitsisitigullu paasissutissanik paarlaasseqatigiinnissaq siunertaralugu, taamaaliornikkut inuusuttut eqqarsaatigalugit ataatsimut ajornartorsiutit suussusersineqarnissaat ataqatigiissumillu suliniutigineqarsinnaasut eqqartorneqarnissaat siunertaralugu.

(Aallartitat siulittaasuut Kim Kielsen)

Tunngavilersuut:

Inuusuttut peqqissusiat, ulluinnarni atugaat, aanngajaarniutinik imigassamillu atuinerat il.il. Islandimi ukiut tamaasa misissorneqartareerput. Taamaattumik siunertaqarluarsinnaavoq qulequttap sammineqartup oqallisigineqarnissaa misilittanillu paarlaasseqatigiinnissaq naalakkersuisunut kaammattuutigissallugu, nunani pingasuni tamani inuusuttut akornanni misissuineramik nutaamik aallartitsingikkaluarluni.

Kaammattuutitut aalajangersagaq nr. 2/2022 akuersissutigineqarpoq Nunat Avannarliit Killiit Siunnersuisoqatigiiffianut Islandip aallartitaat siunnersuummut allannguutissatut siunnersuuteqareermata.

Aalajangersagassatut siunnersuutaaqqaartumi siunnersuutigineqarpoq Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigissagaa nunani avannarlerli killerni inuusuttunik (15-it 30-illu akornanni ukiullit) misissuisitsineq suliaqaqqullugit ulluinnarni atukkat, peqqissuseq, sunngiffimmi soqutigisat, inuit akornanni qarasiaatigut attaveqaqatigiittarfiit qulequttallu allat attuumassuteqarsinnaasut qitiutillugit, ullutsinnilu inuusuttut ajornartorsiutigisaannik ersersitsisinnaasumik. Tamanna eqqarsaatigineqaraluarpoq pissasoq nunani pineqartuni pingasuni apeqqutit tunngavigalugit misissuineramik nalilersuinerikkullu ataqatigiissaakkakut.

Islandimit aallartitat innersuussutigaat inuusuttut peqqissusiat, ulluinnarni inuunerat, aanngajaarniutinik imigassamillu atuinerat il.il. eqqarsaatigalugit Islandimi ukiut tamaasa misissuisoqartareermat.

Islandimit aallartitat isumaqarsimapput angusaqarfiunerusinnaasoq nunani avannarlerni killerni naalakkersuisut taammattorneqarpata qulequttoo oqallisiginissaanut suliassaqarfimmilu milittakkanik

paarlaasseqatigiillugit nunani pingasuni tamani inuusuttunik misissuineramik nutaamik suliaqanngikkaluarluni.

Taamaattumik Islandimit aallartitat siunnersuutigaat Nunat Avannarliit Killiit Siunnersuisoqatigiiffiata kaammattuutitut aalajangersagaq 2/2022 akuersissutigissagaat imatullu allanngortillugu nunani pineqartuni pingasuni inuttut qanoq inissisimanerat pillugit misilittakkanik paarlaasseqatigiinnissaq aamma misissuineramik kisitsisitigullu paasissutissanik paarlaasseqatigiinnissaq siunertaralugu nunani avannarlerni killerni naalackersuisut inuusuttunut suliaqarfimmut akisussaasuusut 2023-mi naapeqatigiinnissaat kaammattuutigalugu.